

Naqqiut

Siunnersuut 31. januari 2019-imeersoq taarserpaa

(Naqqiummi inatsisit teknikkitaannut oqaaseqaatit ilanngunneqarput. Naqqiinerit teknikkimut kukkunersiuinermullu tunngassuteqarput.)

2020-mi akileraarutitigut ilanngaattissat il.il. imatut angissusilerneqarnissaannik Inatsisartut aalajangiiffigisassaattut siunnersuut:

1. Inummut ilanngaat.....kr. 48.000 (ukiumut)
2. Ilangaat aalajangersimasoq.....kr. 10.000 (ukiumut)
3. Aningaasarsiat B-t akileraaruteqaataasussaannngitsut.....kr. 5.000 (ukiumut)
4. Killilimmik akileraartussaataasunut ilanngaat.....kr. 1.000 (ukiumut)
5. Kommuninut ataatsimut akileraarut.....6%

Saqqummiussissut

(Aningaasaqarnermut Nunanilu Avannarlerni Suleqatigiinnermut Naalakkersuisoq)

1. Siullermeerneqarnera

Inatsisartut Aningaasarsianit akileraarutit pillugit Inatsisartut inatsisaat naapertorlugu 2020-mi akileraarutitigut ilanngaattissat il.il. angissusissaat 2019-imi ukiup affaani siullermi aalajangersartussaavaat.

Ilangaatit il.il. pineqartut taassapput:

1. Inummut ilanngaat - § 67, imm. 1.
2. Ilangaat aalajangersimasoq - § 21, imm. 2.
3. Aningaasarsiat B-t akileraaruteqaataasussaannngitsut - § 20, imm. 2.
4. Sulisartunut killilimmik akileraartussaataasunut ilanngaat - § 2, imm. 6.
5. Kommuninut ataatsimut akileraarut - § 63, imm. 2.

Ilangaatit il.il. ataasiakkaat erseqqinnerusumik eqqartorneqarnerat, atuuffii kiisalu ukiuni siusinnerusuni angissusilerneqarsimaneri eqqarsaatigalugit ilanngussaq 1 innersuussutigineqarpoq, soorluttaaq 2020-mi aningaasarsiat tunngavissaattut naatsorsuutigisat ilanngussaq 2-mi nassuiaatigineqartut.

Naalakkersuisut siunnersuutigaat 2020-mi akileraarutitigut ilanngaattissat il.il. 2019-imut sannilliullugit allannguuteqassannngitsut.

Inatsisartut aalajangiiffigisassaattut siunnersuut manna akileraarutitigut ilanngaattissanut atuutereersunut taamaallaat tunngavoq. 2019-imut aningaasanut inatsimmi soorlu ersertoq, Naalakkersuisut inuit appassisumik akunnattumillu isertitaqartut suliinnarnissamut kajumissuseqarnerulersinnissaannut suliniummik piareersaapput. Suliniut sulinermut tapitut

imaluunniit sulinermit ilanngaatitut issasoq naatsorsuutigineqarpoq. Tamatumunnga siunnersuut kingusinnerusukkut saqqummiunneqassasoq naatsorsuutigineqarpoq.

Taamaalilluni ilanngaatit aammalu kommuninut ataatsimut akileraarut 2005-imi akileraartarnikkut aaqqissuusseqqinnerup kingorna allannguuteqartinneqanngillat, ilanngaatimmi taamani katillugit 10.000 kr.-nik qaffanneqarsimapput taakkulu saniatigut kommuninut ataatsimut akileraarut 2 procentpointinik qaffanneqarsimalluni.

Siunnersuut nunatsinni kommuninut tusarniaassutigineqareerpoq. Kommuneqarfik Sermersooq kisiartaalluni tusarniaanermut akissuteqarpoq. 2020-mi kommuninut ataatsimut akileraarutissap allanngortinnagu 6 %-imik angissusilerneqarnissaa Kommuneqarfik Sermersuup isumaqataaffigaa.

2019-imut Politikkikkut Aningaasaqarneq pillugu Nalunaarummi ingerlatseqatigiiffiit akileraartinneqartarnerisa annikillisissinnaanerata pillugu Naalakkersuisut isumaliutersuutiminnik erseqqinnerusumik nassuiaateqassapput, soorluttaaq isertitat B-t akileraarutaasussaangitsut aningaasatigut killissaata qaffanneqarsinnaanerata sunniutissai nassuiarneqassasut.

Taamatut oqaaseqarlunga 2020-mi akileraarutitigut ilanngaatissat il.il. siunnersuutigineqartut angissusilerneqarnissaat Naalakkersuisut sinnerlugit inassutigissavara.